

SICILIA R'AMURI

Nta-ll'aria
màggica ... smania ri stènniri l'ali cùrriri sautari
e nta-ll'armu ...ca pìzzica u cori... si senti
cu veni ri ncianu ri gghiènti sthriera
stu pajsì a -ttri-ppizza
varca ri mari bbannera ssu munti
Mungipiedhu pinnàcciu ri nùvuli...mafiusu ...a-ttaliari
e ccu torna e ccu parti
malincunia ssa frevi ri peni
picciuotti...ca pàssunu u sthrittu...luntanu ...micranti...

Èni ca ciama u sciauru 'i terra
â-bbramu nta-ll'uocci sthrittu u ggestu râ manu
rrùstica rrera ri uommini
ri fimmini bbedhi ardhienti ri cori...
e u sapuri
bbiancu nta-ll'òstia rô pani
russu ntô càlici u sangu rô vinu
e vvirdhi nta-ll'uogghiu cà cula lampa ri meli
sunu... ca cònzunu âmaru
scuntunu cu cianci cu arriri i jorna
ri cristi ccô tascu ri gghiènti nustrana.

E â sira ...nta-ll'uocci ri suonnu umani rô cielu l'armi
'nthra i vivi tòrnunu i pathri
antichi circànnu i so jòla
rràrichi... nta-ll'èrva virdhi râ ciana
bbiancu rrusu rê sciuri
e nta-ll'orta aranci lumiei r'oru e argentu ri suli
e mmiènnili e nnuci...pièrsichi...cirasì.
E quannu u vientu è gghiustu ca veni rô mari
l'ùnna azzurru lucenti...si tingi ri cielu
ri ggiallu... cciù llonga ntê ciùsi 'i lauri
stà gghiènti...canta!...
e quannu u punenti fàuci a gghiùgnu sciùscia a-ll'antu ca meti
e nt'âustu ca spàgghia...
canta ! cu cianci e ccu arriri !
r'allicrizza o ppi rragghia... canta!...canzuna...e vvola!
n-ccoru i so figghi... e i niputi
stizzi ri sangu...ri chista terra
màggica... nosthra Sicilia r'amuri.